

Frau ich freu mich

Interpret und Quelle: BAP – www.bap.de

Dat ess ald widder su en Naach, enn der et wie uss Kanne räant,
Dä letzte Ress vun mir ahm Steuer hängk un Richtung Kölle jähnt.
Woher dä komisch hück, dä Auftritt, ich woher nit besonders drop,
Wenn dat nit bahl ze räane ophührt... woröm blend dä dann jetz op?
Hann ming Fingernäjel bahl bess ahn de Schulter affjekäut
Un die Kassett vum Springsteen ald zom zehnte Mohl erinnjedeut,
Wat ahn 'ner Autobahn romantisch ess, do bleck ich noch nit hinger,
Un dä Mohnd vun Wanne-Eickel ess nu wirklich nit dä Bringer.

Frau, ich freu mich unbeschreiblich op dich.
Jawohl, ich freu mich, freu mich wirklich op dich.
Klar, ich freu mich tierisch op dich.

Ich maach et Radio ahn un paar Minute spääder widder uss,
Denn do kütt usser Peinlichkeite wirklich keine Ton eruss.
Et int'ressiert halt nit, wenn einer singk, dat dä nur mir jehührt,
Et ess mir naax öm drei ejal, wer wie woröm 'ne Jet entführt.
Will nix wesse vun dä Bettwäsch vun Prinz Charles un Lady Di,
Un selvs dat dat wen intressiert, dat intressiert mich jetz ni' mieh.
[Ich will nix wesse vun dä Bettwäsch vun Prince Charles un Camilla,
Un selvs dat dat wen intressiert – okay, vun mir uss, wunderbar.]
Ich stell mich op et Jaspedal, als wöhr hück Wüstenrot-Naach,
Un freu mich wie e' Kind op dich, ich freu mich ald der janzen Daach.

Frau, ich freu mich unbeschreiblich op dich.
Jawohl, ich freu mich, freu mich wirklich op dich.
Klar, ich freu mich tierisch op dich.

Ich wöss ens jähn, woröm dä Vati met däm Sticker „Let's go West“
Mich nit vorbeilööt, oh, die Typen hass ich wirklich wie die Pest!
Met ihre Autonummer op et Sofakesse dropjesteck,
Dä Klopapierroll em jehäkelte Etui diskret versteck.
Birch eraff met Röggewind, minge Speed weed gigantisch,
Ohne Strunzerei: Volle nüngunaachzich!
Hätt ich Flüjel, ich hööv aff, leet all die Trottel unger mir
Un löösch bletzartig hinjebeamt em wärme Bett ald nevvnen dir.
Frau, ich freu mich unbeschreiblich op dich.
Jawohl, ich freu mich, freu mich wirklich op dich.
Klar, ich freu mich tierisch op dich.